

***Ikadua a Sulat
kanu Manga Jaw
sa Kurintu***

Bismillah Sir-Rahman Nir-Raheem

Assalamu Alaikum Warahmatullahi Ta'ala Wabarakatuh

Su nia a sulat na bedtuan sa Ikadua a Sulat'i Bulus kanu Manga Taw sa Kurintu. Lu i nia pakatumpa kanu lumpukan nu 'bpamaginugut a nakapatindeg'i Bulus kanu nangaipus a timpu.

Su kinasulat'i Bulus sa nia na lu natabu kanu prubinsia a Masidunia sia kanu pageletan nu manga lagun a 55 enggu 56 ulian nu kinambata kanu Isa al-Masih. Na kanu nia a manga timpu na aden manga kamutuan kani Bulus pantag kanu kinasugu lun nu Isa al-Masih ka nia kataw nu manga taw sa Kurintu na sabap kanu kapedtala nin sa kamalasyan sa kanu kapenggulalan nin kanu galebekan nin na pendua-dua silan u saben-sabenal a sinugu sekanin nu Isa al-Masih. Ugaid'a pinatuntayan nin kanilan i mana bun su Isa al-Masih a tinemala sa kamalasyan sa kapianan nu manga taw na maitu bun ba sekanin. Na sia kanu kapedtigkel'in kanu manga kamalasyan a 'gkatala nin na pakapailay nin su tidtu-tidtu a kabarakat'u Kadenan taman sa pakaunga sa kapianan kanilan. Nalabit'in bun sia u endaw taman i kapegkalimu nin kanu manga taw sa Kurintu enggu su sangat a kinagalaw nin kanu ngin i inipailay nilan a ula-ula kani Titus a suled sa paginugut a sinugu nin lu kanilan enggu su kabpanginalap'ilan sa kailay nilan kani Bulus.

Nakadalem bun kanu nia a sulat'in su kapedsekat'in kanu 'bpamaginugut lu sa kapangalimuan nilan atawa ka kadtabang'ilan kanu manga pakanasisita, labi lawan den kanu suled'ilan sa paginugut a 'gkangapasangan kanu prubinsia a Yudia.

Na nakadalem bun kanu nia a sulat'in su kabpaninindeg'in kanu galebekan nin enggu su kinapatuntay nin sa saben-sabenal a sinugu sekanin nu Kadenan sa apia nia nin kaaden i sia kanu kapegkailay nu ped na mababa bu sekanin a taw kumin kanu manga ped a 'bpamamandu sa dikena luyud sia kanu bantang. Sinekat'in bun su 'bpamaginugut lu sa di dait a unutan nilan su apia ngin a panduan a salakaw kanu inipamandu nin kanilan pantag kanu Isa al-Masih. Na pinangeni nin bun kanilan i paginapasen nilan i kapaguyag-uyag'ilan sa aden kalilintad'in enggu dala makatila kanilan taman sa inggulalan nilan su langun nu papata nin. Ka amaika maitu na tapiden silan nu Kadenan.

Su Salam'i Bulus enggu su Kinadsukul-sukul'in

1 ¹Salam sa lekanu. Saki si Bulus a sinugu nu Isa al-Masih sia luyud kanu kahanda nu Kadenan. Kaped ku si Timuti a lusud tanu sa tian sa paginugut. Su nia a sulat na san pakatumpa sa lekanu a lumpukan nu 'bpamaginugut kanu Kadenan sa dalepa a Kurintu taman den kanu langun na nasuti sabap kanu Isa al-Masih san sa prubinsia a Akaya.

²San sa lekanu su da idsan nin a limu enggu su kalilintad a ebpun kanu Ama tanu a su Kadenan^a enggu kanu Mapulu tanu a su Isa al-Masih.

³Su Kadenan a Ama nu Mapulu tanu a su Isa al-Masih a Kadenan nin bun na sangat a pebpugin. Sekanin su Ama a sangat a malimu a lalayun papegkabagel kanu manggiginawa tanu. ⁴Sekanin i papegkabagel sa lekitanu kanu langun na kamalasaan a 'gkatala tanu ka enggu tanu makapagkabagel su apia entain a pedtala sa kamalasaan a mana bun su kapapegkabagel'u Kadenan sa lekitanu. ⁵Ka u ngin i kabpangiseg'u manga kamalasaan tanu sabap sa nalusud tanu kanu Isa al-Masih na maitu bun ba i kabpangiseg'u kapapegkabagel kanu manggiginawa tanu sia makanggulalan kanu Isa al-Masih. ⁶Na su kapedtala nami sa kamalasaan na pakaunga sa kagkabagel'u manggiginawa nu enggu kalipuasan nu. Na maitu bun su kapapegkabagel'u Kadenan kanu manggiginawa nami na pakaunga bun sa kabagel'a manggiginawa nu ka enggu nu katigkelan su kamalasaan a 'gkangatala nu a mana bun su manga kamalasaan a 'gkangatala nami. ⁷Na masela i salig'ami sa lekanu sa makatigkel kanu kagina u ngin i kapegkatala nu sa kamalasaan a mana bun su kamalasaan nami na maitu bun ba su kapapegkabagel kanu manggiginawa nu a mana bun su kapapegkabagel kanu manggiginawa nami.

⁸Manga lusud ku sa tian, na di nami 'gkalinian a di nu kasabutan su manga kamalasaan a natala nami sa prubinsia a Asia.^b Ka sangat man a mapasang i natala nami ka di kami den pedtika sa kapasang taman sa

^a **1:2 Ama tanu a su Kadenan** Su langun nu taw a 'bpaginugut kanu Kadenan na mapakay a edtalun sa nabaluy a wata nu Kadenan. Madakel pan i kasabutan tanu makapantag kanu Ama tanu a su Kadenan sia kanu *Maena nu Mangadalem a Kadtalu kanu Kitab* a mailay kanu kapupusan nu nia a kitab.

^b **1:8 Su Asia** sia a nalabit na isa kanu manga prubinsia na Ruma paganay. Ugaid'a sa saguna a timpu na sakup'a Turkey a lu tampal kanu sedepan nin. Su *Asia* a nia na dikena su Asia sa saguna a isa kanu manga pitu timan a "continent."

2 Kurintu 1

da den inam'ami sa mauyag kami pan. ⁹Ka nia nami man kataw kanu entu na natatalanged a matay kami den. Ugaid'a nanggula su entu ka enggu di kami makasalig kanu ginawa nami ka lu kami makasalig kanu Kadenan a papembibiag kanu namamatay. ¹⁰Sekanin i linemipuas sa lekami kanu natatalanged a entu a kapatay enggu papanalusen nin su kabpamelipuas'in sa lekami. Na pedsalig kami sa papanalusen nin i entu ¹¹sia kanu kadtabang'u sa lekami sia makanggulalan kanu pangeni-ngeni nu sa lekami. Na amaika maitu na madakel i makadsukul-sukul kanu Kadenan sabap kanu palihala nin sa lekami a unga nu pangeni-ngeni nu madakel a taw.

Su Kinambagu na Kahanda ni Bulus

¹²Na nia nami makamamasela na 'gkatatalanged'ami sa ginawa nami i pibpia-pianan nami i ukit'ami kanu manga taw, labi lawan den sa lekanu. Na senep man sa atay nami su ukit'ami sa aden katidtu nin ebpun kanu Kadenan enggu sia luyud kanu da idsan nin a limu nu Kadenan dikena sia luyud kanu kaduduniay a ilemu. ¹³⁻¹⁴Ka da man inisulat'ami sa lekanu a di nu 'gkabatia sa mapia enggu di nu 'gkatuntayan. Apia di kami nu pamun gaid 'gkatuntayan sa saguna a timpu ugaid'a masela i salig'ami sa lekanu sa mauma bun i gay a katuntayan kami nu sa tidtu-tidtu taman sa makamamasela kami nu a mana bun su kamamasela nami sa lekanu sia kanu kauma nu Mapulu tanu a su Isa al-Masih.

¹⁵Na sabap sa masela i salig ku sa lekanu sa entu, na nia ku napagitung paganay na seman aku muna sa lekanu ka enggu matakep su palihala a matalima nu. ¹⁶Kagina nia ku ba a entu kahanda na maut aku san sa lekanu sa kanu kalu ku sa Masidunia enggu su kambalingan ku menem ebpun sa Masidunia na maut aku bun san sa lekanu ka enggu aku nu kadtabangan sa kalu ku sa Yudia. ¹⁷Na kagina ka dala makatalus su entu a kahanda ku na basi nia nu mapagitung na malemu embagu i itungan ku atawa ka pigkahanda ku su entu sia luyud kanu kamamanusiay a kapagitung ku bu a matag aku bu pedtalu sa "uway," atawa ka "dili" inunta na dikena i entu benal. ¹⁸Na dikena aku maitu, ka u ngin i katidtu nu Kadenan na maitu bun ba i katidtu nami sa kadtalunami sa "uway," atawa ka "dili." ¹⁹Kagina su Tunggal'u Kadenan a su Isa al-Masih a inipangusiat'ami san sa lekanu a kaped

2 Kurintu 1, 2

ku si Silbanu^c enggu Timuti na di edtalu sa “uway” atawa ka “dili” amaika dili matuman. Ka sia man sa lekanin na “uway” man langun²⁰ ka apia ngin man i kadakel’a pasad’u Kadenan na matuman sia kanu Isa al-Masih. Tembu sia makanggulalan kanu Isa al-Masih na pakadtalu tanu sa “Amin” sa kapugi kanu Kadenan. ²¹ Na su Kadenan i papegkabagel kanu salig’ami taman kanu salig’u sia kanu Isa al-Masih. Na pinamili tanu nin ²² taman sa tiniapan tanu nin sa tanda a nalusud tanu sa lekanin ka pinalangkap’in sa lekitanu su Suti a Ruh nin a nabaluy a pamagel tanu sa tumanen nin su langun nu inibpasad’in sa lekitanu.

²³ Na su Kadenan i pakailay kanu atay ku sa nia sabap a dala ku katalus seman sa Kurintu na asal’a ’gkaabungan su masakit a kapatidtu ku sa lekanu. ²⁴ Dikena nia nin maena i sekami i pegkakataw sa lekanu sia kanu kapedsalig’u ka pedtabanga tanu asal’a magalaw kanu kagina mabagel den man i salig’u.

2 ¹ Tembu nia ku napagitung na di aku den seman sa lekanu amaika makalidu den menem sa ginawa nu. ² Ka amaika saki man i sabapan na kalidu na ginawa nu na panun pan i kapagkagalaw nu sa laki? Kagina sekanu man i papegkagalaw sa laki. ³ Tembu nia ku pinggula na napapait aku sa sulat sa lekanu paganay ka enggu sa kauma ku san na di den malidu i ginawa ku sa lekanu a papegkagalaw sa laki. Ka masela man i salig ku sa su kagalaw ku na kagalaw nu bun langun. ⁴ Na su kinasulat ku a entu sa lekanu na dikena malemu kanu ginawa ku taman sa madakel man i nakaigis a lu kanu mata ku sabap kanu kapegkalidu na ginawa ku. Ugaid’a dikena nia nin maena i ’bpelidun ku i ginawa nu ka papegkataan ku bu sa lekanu u endaw taman i kapegkalimu ku sa lekanu.

Su Kaampun kanu Mindusa

⁵ Na pantag menem kanu taw a entu a pembaladusa na dikena saki bu i malidu i ginawa nin sa entu ka apia ngin den na langun nu na malidu bun i ginawa nin sa entu amaika dikena aku menem pedsusubela sa

^c 1:19 **Silbanu** Na su ngala a Silbanu na sia sa basa a Hibru Aramaik na *Silas*. Nia bun ba si Silas a nalabit kanu Manga Pinggalebek’u Manga Sinugu nu Isa al-Masih 15 taman sa 18 sia kanu Kitab Injil.

2 Kurintu 2

kapedtalu ku sa entu. ⁶Ugaid'a nasasangan den man kanu entu a taw su inisiksa lun a napamagayunan nu kadakelan kanu 'bpamaginugut. ⁷Ka nia man dait na ampun nu sekanin saguna enggu pagkabagel'u i manggiginawa nin ka enggu di kasubelan na lidu na ginawa. ⁸Kagina ka maitu na 'bpangenin ku sa lekanu i ipagedam'u sa lekanin sa mapia su limu nu lun. ⁹Na nia pan sabapan na kinasulat ku a entu sa lekanu paganay na asal'a katawan ku u ngintu, saben-sabenal a 'bpaginugutan nu su inisugu ku sa lekanu? ¹⁰Na apia entain i ampunen nu, na ampunen ku bun. Na sia sa laki na u ngin i dait a ampunen kanu entu a taw na inampun ku den. Na pinggula ku i entu kagina su entu na lekanu bun a kopianan sia kanu adapan nu Isa al-Masih ¹¹asal'a di tanu kapamakutan mamagakal'u Datu na Giadsal kagina katawan tanu man a benal su ngin i manga mawag a kahanda nin.

Su Dala Kapagilaya ni Bulus kani Titus lu sa Truas

¹²Na guna aku makauma lu sa dalepa a Truas^d ka ibpangusiat ku su Mapia a Tutuma pantag kanu Isa al-Masih na inadil'u Isa al-Masih sa laki su ukit sa kabpangusiat ku pantag sa lekanin sa dala nakaungen lun. ¹³Ugaid'a apia ka maitu na dala bun malilintad i manggiginawa ku sabap sa da kami makapagilaya kanu lusud tanu sa tian sa paginugut a si Titus. Na guna su maitu na nagetaw aku kanu 'bpamaginugut lu, ka tinemalus aku lu sa Masidunia.

Su Kambantas a sia Makanggulalan kanu Isa al-Masih

¹⁴Ugaid'a sukul-sukul kanu Kadenan ka sabap kanu kinaisa tanu kanu Isa al-Masih na lalayun tanu nin 'bpangunanan a mana tanu ipegkuyug a nataban nin. Su Kadenan bun i pabpelapat kanu ilemu pantag kanu Masih sa kanu apia endaw a dalepa sia makanggulalan sa lekami. Na su nia a ilemu na mana kamut'u kamutan. ¹⁵Kagina sia kanu Kadenan na mana kami baw nu mamut a kurban a su Isa al-Masih. Na 'gkabaw su entu nu apia entain a taw magidsan pan i 'gkalipuas atawa ka pakaidtug sa naraka a taw. ¹⁶Na sia kanu manga taw a makaidtug sa naraka na nia nami baw na pakapatay. Ugaid'a sia menem kanu manga taw a malipuas

^d 2:12 Mailay i nia sia kanu Manga Pinggalebek'u Manga Sinugu nu Isa al-Masih 16 ayat 8 taman sa 11; 20 ayat 1 sia kanu Kitab Injil.

na nia nami baw na pakauyag. Na entain ba man i makagaga lun i entu enggula a galebekan? ¹⁷Ugaid'a sabap sa nalusud kami kanu Isa al-Masih enggu pinamili kami nu Kadenan a masugu nin na 'gkanggula nami su entu sia kanu adapan nu Kadenan sa senep sa atay, dikena pagidsan nu madakel a taw a ibpamantiali nilan su kadtalu nu Kadenan asal'a makagkuleta silan.

Su Bagu a Kapasadan nu Kadenan

3 ¹Aden a entu na madtalu nu menem i ibpemamasela nami i ginawa nami. Na dikena kami pagidsan nu ped a nasisita nilan pan i makadtatanggit sa sulat a pamagel'ilan magidsan pan i san pakatumpa sa lekanu atawa ka san pakabpun sa lekanu. ²Ka sekanu den man i nabaluy a sulat a 'gkadtatanggit'ami a nakasulat sia kanu pamusungan nami a 'gkasabutan sa mapia enggu 'gkabatia nu apia entain. ³Na 'gkailay man sa lekanu i sekanu i sulat a ebpun kanu Isa al-Masih a inisulat sia nakanggulalan sa lekami. Su nia a sulat na dikena inisulat sa ukit a dawat ka sia kanu Ruh^e nu kaisa-isa nin a Kadenan, dikena bun sia inisulat kanu manga tebi nu watu ka sia inisulat kanu pamusungan nu taw.

⁴Na masela i salig'ami sa benal su pedtalun nami sia kanu adapan nu Kadenan sabap sa nalusud kami kanu Isa al-Masih. ⁵Na di nami magaga enggula su langun nu entu sa lekami bu a kapegkagaga. Ka su Kadenan man i 'bpagenggay sa lekami sa kapegkagaga penggula sa entu. ⁶Sekanin bun i minaluy sa lekami a kasaligan kanu kapebpayag kanu bagu a kapasadan.^f Su nia a kapasadan na dikena su inisulat a kasuguan ka sia i nia kanu Suti a Ruh. Ka su inisulat man a entu a kasuguan na 'bpagagak sa kapatay^g ugaid'a su Ruh na 'bpagenggay sa uyag-uyag.

^e **3:3 Ruh** Nia ba su *Ruhhul Allah* atawa ka su Suti a Ruh nu Kadenan. Madakel pan i kasabutan tanu makapantag kanu Suti a Ruh nu Kadenan sia kanu *Maena nu Mangadalem a Kadtalu kanu Kitab* a mailay kanu kapupusan nu nia a kitab.

^f **3:6 Su bagu a kapasadan** na nia ba su balapantag sa langun kanu kapasadan nu Kadenan sia kanu kitab a su kapasadan nu Kadenan pantag kanu Isa al-Masih. Na nasambian nu nia a kapasadan su danden a kapasadan a su inisulat a kasuguan a inenggay kanu manga taw a Israil sia nakanggulalan kanu Musa. Na su dalem'u nia a bagu a kapasadan na su kinanggihad'u Isa al-Masih kanu umul'in asal'a maaun su apia entain a maginugut sa lekanin kanu langun nu mawag a galebekan nilan taman sa maampun su kabaladusan nilan.

^g **3:6 su kasuguan na 'bpagagak sa kapatay** Nia kinadtalu sa pakaagak sa kapatay na kagina dala pakatalutup kanu langun nu kasuguan ka apia sawalu bu i da nengka matalutup na makandusa ka bun.

2 Kurintu 3

⁷Na su kasuguan a entu a pakaagak sa kapatay a inisulat kanu tebi a watu na lu su sigay nu Kadenan kanu kinaenggay nin lun tembu di 'gkadtulikan nu manga taw a Israil su beneng'u Musa ka 'gkaipeng silan ugaid'a pebpapas bun su entu.^h Na amaika su entu ka inipailay nu Kadenan i kasigay nin ⁸na labi lawan den i kapailay nin kanu sigay nin kanu galebekan sia kanu Ruh nin. ⁹Na amaika su galebekan sia kanu inisulat a entu a kasuguan a pakasugat sa kawagib kanu manga taw ka aden lu sigay nu Kadenan na labi lawan den su galebekan a pakaagak kanu taw sa katimbang lun sa ikelas. ¹⁰Ka su sigay nu entu a kasuguan na mibpapas den sabap sa nalawanan nu sigay nu bagu a kapasadan. ¹¹Na amaika su galebekan a entu a mibpapas ka aden sigay nin na labi lawan den a aden sigay nin su bagu a kapasadan a di 'gkapupus.

¹²Tembu da den gilek'ami sa kapebpayag'ami kanu bagu a kapasadan ka masela man i salig'ami sabap kanu langun nu entu. ¹³Na dikena kami pagidsan nu Musa a tinangguban nin su beneng'in ka asal'a di 'gkailay nu manga taw a Israil su kapebpapas'u kasigay nu beneng'in. ¹⁴Ka nia nin kabantang na inawan man sa katuntay su manga taw a Israil ka sampay saguna na uman pembatian su danden a kapasadan na mana aden nakadalinding kanu mata nilan ka enggu di nilan mailay su tidtu a maena nu danden a kapasadan. Na nia bu kaawa nu entu na sia bu makanggulalan kanu Isa al-Masih. ¹⁵Tembu sampay saguna na uman pembatian su danden a kapasadan a sia nakanggulalan kanu Musa na nadalindingan pamun su mata nilan. ¹⁶Ugaid'a apia entain menem i semupeg kanu Mapulu na maawa su nakadalinding a entu kanu mata nilan.

¹⁷Na su pedtalun sia a Mapulu na su Suti a Ruh nu Kadenan, na apia entain i aden sa lekanin su Ruh nu Mapulu na makambaya-baya den sekanin. ¹⁸Na sekitanu na naawan den na tanggub'a beneng ka enggu 'gkailay sa lekitanu su sigay nu Mapulu.ⁱ Na pembagun tanu nin taman sa makailing tanu sa lekanin a 'bpangiseg-'bpangiseg bun su sigay tanu a ebpun kanu Mapulu a su Ruh nu Kadenan.

^h 3:7 Mailay i nia sia kanu Kinaliu 34 ayat 29 taman sa 35 sia kanu Kitab Taurat.

ⁱ 3:18 'gkailay sa lekitanu su sigay nu Mapulu Nia ped a kapegkasabut sa nia na 'gkaalung tanu su sigay nu Mapulu.

Su Kakawasan a Nakatagu kanu Binangga

4 ¹Na inisalig'u Kadenan su nia a galebekan sa lekami sia nakanggulalan kanu da idsan nin a kapegkalimu nin. Tembu di kami semangkup ²ka makin nami ipangusiat sa matakapala su bantang a kadtalu nu Kadenan. Ikias'ami su manga ibpamagena a galebek a pakaya, su kasalimbut enggu su kapasibay kanu kadtalu nu Kadenan. Na kanu maitu ba a ukit na makapailay nami kanu manga taw i matulanged kami enggu nia labi a pakailay sa entu na su Kadenan. ³⁻⁴Na benal man a aden manga taw a nadalindingan i mata nilan ka enggu di nilan 'gkatuntayan su Mapia a Tutuma a ibpangusiat'ami ugaid'a su entu ba a manga taw na su di 'bpamaginugut a makaidtug den sa naraka. Na su Datu na Giadsal a pendatu kanu sagugunay a timpu i dinemalinding kanu mata nilan asal'a di nilan mailay su sigay nu Mapia a Tutuma a makapantag kanu kabarakat'u Isa al-Masih a alung-alung'u Kadenan. ⁵Na dikena man nia nami ibpangusiat i makapantag kanu ginawa nami ka nia nami ibpangusiat na su Isa al-Masih na sekanin su Mapulu. Na pebpanunugu kami sa lekanu sabap kanu Isa al-Masih. ⁶Kagina su Kadenan a midtalu sa "Makatayaw su maliwanag sia kanu kalibutengan"^j na sekanin demun i nakatayaw kanu atay nami ka enggu kaliwanagan su ginawa nami sa katuntay kanu sigay nin a 'gkailay sia kanu Isa al-Masih.^k

⁷Na su balapantag a nia a kakawasan a sia sa lekami na mana nakabetad kanu budta a binangga ka enggu mailay sa mapia i su Kadenan i saben-sabenal a 'gkabpunan nu entu a dala idsan nin a kabarakatan, dikena sa lekami. ⁸Na sangat a papegkapasangan kami sa apia ngin a ukit ugaid'a di kami 'gkatalaw, apia nia nin kaaden i aden a entu na 'gkabulibug kami sa u ngin i enggulan nami ugaid'a di kami bun 'gkaawan na inam. ⁹Bpamungkaidanan kami ugaid'a di kami papedtadayn nu Kadenan. Aden a entu na papegkasakitan kami ugaid'a di kami bun pebpatay. ¹⁰Ka apia endaw kami man pebpawang na tatap kami pedsangul sa kapatay a mana su nanggula nu Isa al-Masih

^j 4:6 Mailay i nia sia kanu Manga Awal 1 ayat 3 taman sa 5 sia kanu Kitab Taurat.

^k 4:6 **sia kanu Isa al-Masih** Nia nin maena sa basa a Grik na *sia kanu beneng'u Isa al-Masih*. Su kabarakat'u Kadenan na 'gkailay sia kanu Isa al-Masih taman sa taman, dikena mana su kapedsigay nu beneng'u Nabi Musa a pebpapas bun. Mailay i entu sa kanu nia bun ba a kitab 3 ayat 7 enggu 13. Ebpun i nia sia kanu Kinaliu 34 ayat 29 taman sa 35 sia kanu Kitab Taurat.

ka enggu mailay sia sa lekami su uyag-uyag'u Isa al-Masih. ¹¹Ka taman man a bibiag kami pan na tatap kami pedsangul sa kapatay sabap kanu kabpaginugut'ami kanu Isa al-Masih ka enggu mailay su uyag-uyag'u Isa al-Masih a di 'gkapupus sia kanu badan nami a 'gkapupus bun. ¹²Na apia ka maitu sa pedsangul kami sa kapatay sia kanu kabpangusiat'ami ugaid'a nia nin mambu 'gkaunga sa lekanu na uyag-uyag a da taman nin.^l

¹³Na mana bun su nakadalem kanu kitab a "Sabap kanu paginugut ku na pedtalu aku,"^m na maitu kami bun ba, 'bpangusiat kami sabap sa 'bpaginugut kami. ¹⁴Ka 'gkatawan nami i su Kadenan a napambibiag kanu Mapulu tanu a su Isa al-Masih na sekanin bun i mapambibiag sa lekami sia kanu Isa al-Masih ka enggu kami nin mapananggit sia kanu adapan nin a kaped'ami sekanu. ¹⁵Na su langun man nu nia na lekanu a kopianan ka enggu sia makanggulalan kanu kapegkadakel'u makatalima kanu da idsan nin a limu nu Kadenan na 'gkadakel-'gkadakel bun su pakadsukul-sukul a pakapugi kanu Kadenan.

Su Uyag-uyag a Unut su Salig

¹⁶Tembu entu ba i sabap'in sa di kami semangkup sa apia nia nin kaaden i pegkalubay-pegkalubay bun su badan nami ugaid'a pegkabagel-pegkabagel bun mambu su manggiginawa nami kanu uman-uman gay. ¹⁷Kagina su gagalu bu a nia a kamalasyan a 'gkatala nami saguna na madtalu a dikena bun gaid mapasang ka nia nin unga na su dala kapedtaman nin enggu dala pagidsan nin a kabadtugan. ¹⁸Tembu sekami na dikena nami den 'bpagilayn u ngin i matakapala a 'gkailay nu mata nami sia sa dunia ka nia nami den 'bpagilayn na su dikena matakapala a 'gkailay nu mata nami. Kagina su ngin i matakapala a 'gkailay nu mata na 'gkapupus bun ugaid'a su dikena matakapala a 'gkailay nu mata na dala kapegkapupus'in.

Su Bagu a Badan

5 ¹Na amaika mabinasa den su balung-balung a pendalesan tanu sia sa dunia a mana su badan tanu na aden walay a pagkalebenan nu Kadenan sa lekitanu lu sa sulega a dala kapegkabinasa nin a

^l 4:12 uyag-uyag a da taman nin Su nia na dikena kakawasan sa dunia. Ka su uyag-uyag a da taman nin, nia ba su matalima nu taw amaika semalig silan kanu Isa al-Masih. Na apia entain i makatalima kanu nia ba na di den temala sa kasiksan lu sa Mauli a Gay.

^m 4:13 Mailay i nia sia kanu Manga Sengal 116 ayat 10 sia kanu Kitab Zabur.

2 Kurintu 5

dikena inumbal'u manusia. ²Na pakauliang tanu sa kapedtala tanu sa kamalasaan kanu nia a badan tanu sa dunia tembu 'gkapangingalap tanu den a benal a makasangan den sa lekitanu su badan sa sulega. ³Ka amaika makasangan den sa lekitanu su badan sa sulega na di makagkawas-kawas su ngiawa tanu. ⁴Ka gagalu na sia tanu pan kanu badan tanu sa dunia na 'gkapsangan tanu kanu manga kamalasaan a 'gkatala tanu ugaid'a dikena nia nin maena i 'gkalilinian tanu i makagkawas-kawasⁿ su ngiawa tanu ka nia tanu 'gkalilinian na makasangan sa lekitanu su badan a lu sa sulega ka enggu su badan tanu sa dunia a aden papatayan nin na kasambian nu badan sa sulega a da papatayan nin. ⁵Na su Kadenan bun i minadil sa lekitanu sa kanu entu ba a kahanda nin. Na inenggay nin sa lekitanu su Suti a Ruh nin a pamagel tanu sa tumanen nin su inibpasad'in.

⁶Tembu ba dala kandua-dua na ginawa nami. Na 'gkataan nami bun man i taman sa sia kami pan kanu badan nami sa dunia na di nami pan madtagapeda sa matakapala su Mapulu. ⁷Ugaid'a dikena i entu pakaungen ka 'bpaguyag-uyag kami man sa ukit a kapedsalig sa lekanin dikena sa matakapala a 'gkailay nu mata. ⁸Tembu dala a benal kandua-dua na ginawa nami. Na nia nami pan tinemu i matagak'ami den su badan sa dunia ka enggu nami den madtagapeda sa matakapala su Mapulu. ⁹Na namba i sabap'in i nia nami den pinadsatiman kanu ginawa nami na u panun i kasuat'ami sa lekanin magidsan pan i sia kami pamun sa dunia atawa ka dala den. ¹⁰Ka uman i isa sa lekitanu na semangul sa kukuman nu Isa al-Masih ka enggu tanu matalima su ngin i makadait sa lekitanu sia luyud kanu ngin i pinggalebek tanu sia sa dunia magidsan pan i mapia atawa ka mawag.

Su Kambalingan kanu Kadenan sia Makanggulalan kanu Isa al-Masih

¹¹Na kagina ka katawan nami u ngin ba i tidtu-tidtu a kagilek kanu Mapulu na di nami telenan su manga taw sa kapapaginugut kanilan kanu Isa al-Masih. Na su Kadenan man i pakataw sa u entain kami enggu 'gkapangingalap'ami bun i katawan kami nu bun sa tidtu-tidtu. ¹²Na dikena nia nin maena i ibpemamasela nami menem i ginawa

ⁿ 5:4 Su makagkawas-kawas sia na dikena nia nin maena i dala balegkas'u badan ka nia nin maena na dala 'gkambetadan nu ngiawa ulian nu kapitas'in kanu badan sa dunia.

2 Kurintu 5, 6

nami sa lekanu ugaid'a nia nami pegkiugan na aden makamamasela nu pantag sa lekami ka enggu aden makasawal'u kanu manga taw a nia nilan ibpemamasela na u ngin bu i matakapala a 'gkailay kanilan, dikena su ngin i sia kanu dalem'u pamusungan nilan. ¹³Na amaika nia menem kapegkailay nu sa lekami i 'gkabuneg kami na sabap i entu kanu kabpaginugut'ami kanu Kadenan. Ugaid'a amaika nia nu menem kapegkailay sa lekami i mapia i itungan nami na lekanu i entu a kopianan. ¹⁴Kagina su limu man nu Isa al-Masih i pakasekat sa lekami. Kagina natatalanged'ami man i minatay su Isa al-Masih sa kanu kopianan nu langun nu taw tembu timbang a minatay tanu langun. ¹⁵Na minatay sekanin sa kopianan nu langun nu taw ka enggu su apia entain a nakatalima kanu uyag-uyag a da taman nin na di den silan maguyag-uyag sia kanu kiug'ilan demun ka sia den silan maguyag-uyag kanu Isa al-Masih a minatay enggu pinambibiag 'bpaluman sa kanilan a kopianan.

¹⁶Tembu saguna na dikena nami den 'bpagilayn su apia entain a taw sia luyud kanu kamamanusiay a kapagitung, ka apia su kapagitung'ami paganay pantag kanu Isa al-Masih na sia bun luyud kanu kamamanusiay ugaid'a saguna na dikena den maitu. ¹⁷Na kagina ka maitu na apia entain i nalusud kanu Masih na nabagu den sekanin. Na u ngin i danden sa lekanin na naawa den su langun nu entu ka nabagu den. ¹⁸Na su langun nu nia na ebpun kanu Kadenan a napambalingan sa lekitanu sia sa lekanin sia makanggulalan kanu Isa al-Masih enggu sekanin i minenggay sa lekami kanu nia a galebekan a su kapambalingan kanu manga taw sia sa lekanin. ¹⁹Nia nin maena na sia kanu Isa al-Masih na pambalinganen nu Kadenan su taw sia sa lekanin taman sa di den ipedtimbang a baladusa silan. Na sinaligan kami sa kapayag pantag kanu kambalingan nu taw kanu Kadenan. ²⁰Kagina ka maitu na su Isa al-Masih i sinemugu sa lekami enggu sia makanggulalan sa lekami na 'bpagenggaten kanu nu Kadenan sa kambalingan nu sa lekanin. Na sia makanggulalan kanu ingala nu Isa al-Masih na ibpamagayuk'ami sa lekanu sa embalingan kanu den kanu Kadenan. ²¹Ka su Isa al-Masih a dala kabaladusan nin na inipanggumaked'u Kadenan sa lekanin su kabaladusan tanu asal'a makatimbang tanu sa ikelas sia kanu Kadenan sia makanggulalan kanu kinaisa tanu sa lekanin.

6 ¹Na sia kanu kapenggalebek'ami a nia a pedtapiden kami nu Kadenan na 'bpangenin nami sa lekanu i di nu semuguti sa kaawan

2 Kurintu 6

na katagan su da idsan nin a limu nu Kadenan a natalima nu. ²Ka nia man kadtalu nu Kadenan na

“Kanu timpu a inadil ku a kutika na pinakikineg ku seka,
kanu kutika nu kalipuasan na tinabangan ku seka.”^o

Ilay nu, nia den ba su kutika a inadil’u Kadenan a su kutika nu kalipuasan!

³Na di kami man mangaden sa kagebpa nu apia entain ka enggu di katilan su galebekan nami kanu Kadenan. ⁴Na pakapailay nami i saben-sabenal i sinugu kami nu Kadenan sia kanu kapedtigkel’ami kanu apia ngin a kamalasakan enggu kapasang’a ’gkanggula, ⁵kapapegkasakit sa lekami, kapembilanggu sa lekami enggu su kapedsamuk sa lekami nu manga taw. Na pedtantu kami penggalebek apia nia nin kaaden i aden a entu na dala tulug’ami enggu dala ’gkakan nami. ⁶’Bpaguyag-uyag kami sa matilak, aden katuntay nin enggu katigkel’in taman sa ’bpangalimuan kami. Sia sa lekami su Suti a Ruh enggu su tidtu-tidtu a kapegkalimu. ⁷Ibpangusiat’ami su bantang sia makanggulalan kanu kabarakat’u Kadenan a sia sa lekami. Na su kaikelasan i matalem’ami sia kanu biwang kawatan a lima nami. ⁸Na magidsan pan i ’bpagadatan kami atawa ka dili, pebpugin kami atawa ka ipedsinta kami na bantang su kadtalu nami ugaid’a apia ka maitu na ipedtimbang kami pamun nu ped sa manga budtuden. ⁹Na apia pegkilalan kami nu madakel ugaid’a aden bun ped a di pegkilala sa lekami. Na timbang man a minatay kami den ugaid’a bibiag kami bun. Papegkasakitan kami sabap sa kapapedtidtu sa lekami^p ugaid’a dikena kami bun menem pebpatay. ¹⁰Na apia nia kapegkailay nu taw i ’gkaidu i ginawa nami ugaid’a nia nin kabantang na magalaw kami. Miskinan kami ugaid’a madakel i pakapagkawasa nami. Na apia nia kapegkailay nu taw sa lekami i dala kaaden nami ugaid’a nia nin kabantang na lekami su langun-langun.^q

¹¹Manga lusud’ami sa tian a manga taw sa Kurintu, na mimbantangan kami sa lekanu sa mapia sa kanu manga kadtalu nami sa lekanu enggu

^o 6:2 Ebpun i nia sia kanu Kitab a Inisulat’u Nabi Isayas 49 ayat 8.

^p 6:9 **Papegkasakitan kami sabap sa kapapedtidtu sa lekami** Sia sa basa a Grik na *kapapedtidtun kami*. Nia nin maena na aden a entu na pedsugutan nu Kadenan i papegkasakitan silan nu ped a taw, ugaid’a ukit i entu nu Kadenan sa kapapedtidtu nin kanilan. Mailay i nia sia kanu Manga Sengal 118 ayat 17 taman sa 18 sia sa Kitab Zabur.

^q 6:10 **lekami su langun-langun** Na nia maena nu *lekami su langun-langun* na u nalusud ka kanu Isa al-Masih na da den ped a nasisita nengka ka sekanin su tidtu a kakawasan.

su kapegkalimu nami sa lekanu na dala tedtab'in. ¹²Na dikena nami pedsapalan i ginawa nami sa kapegkalimu nami sa lekanu. Ugaid'a sekanu na pedsapalan nu i ginawa nu sa kapegkalimu nu sa lekami. ¹³Na ipembitiala ku sekanu sa mana su kapembitiala nu ama kanu wata nin sa 'bpangenin ku sa lekanu i ikalimu kami nu sa mana bun su kapegkalimu nami sa lekanu.

Su Di Kapagisa kanu manga Taw a dikena 'Bpamaginugut

¹⁴Na di nu ipagisa su manga taw a dikena 'bpamaginugut. Ka di man mapakay a maisa su ikelas a taw enggu su dikena ikelas. Na maitu bun ba, di bun mapakay a maisa su maliwanag enggu su malibuteng. ¹⁵Di bun masulut a maisa su Masih enggu su Datu na Giadsal.^r Na maitu bun ba su 'bpamaginugut enggu su dikena 'bpamaginugut na di bun mapakay a maisa. ¹⁶Di bun masulut a maisa su Suti a 'Bpagagaman kanu Kadenan enggu su manga pegkakadenanen. Na sekitanu man su Suti a 'Bpagagaman nu kaisa-isa nin a tidtu a Kadenan sa nia nin kadtalu na

“Tapiden ku silan sia kanu kabpaguyag-uyag'ilan.

Saki i Kadenan nilan

enggu silan menem i mabaluy a manga taw ku.”^s

¹⁷Nia pan ped a kadtalu nu Kadenan na

“Tagak'u silan

enggu pitas kanu kanilan.

Di nu kemembil su apia ngin a maledsik,^t

ka amaika maitu na taliman ku sekanu.

¹⁸Na saki i mabaluy a Ama nu

enggu sekanu menem i mabaluy a manga wata

ku a babay-mama.

Na saki ba su Kadenan a Mapulu a Barakat sa Langun

i pedtalu sa entu.”

^r 6:15 Su **Datu na Giadsal** sa basa a Grik na *Belial* a nia nin maena na *dupang* atawa ka *da katagan nin*. Aden a entu na su manga taw a manga Yahudi na 'bpagusalen nilan su nia a ngala a ipembedtu nilan kanu Saitan.

^s 6:16 Ebpun i nia sia kanu Libitikus 26 ayat 12 sia kanu Kitab Taurat enggu sia kanu Kitab a Inisulat'u Nabi Isikil 37 ayat 27.

^t 6:17 Ebpun i nia sia kanu Kitab a Inisulat'u Nabi Isayas 52 ayat 11.

7 ¹Manga papedtayan ku a pakat ku, na kagina ka aden sa lekitanu su maitu a manga pasad'u Kadenan na itangka tanu i ginawa tanu kanu apia ngin a makagkaledsik kanu badan tanu enggu ginawa tanu. Paginapasen tanu su talutup a kaikelas sabap kanu gilek tanu kanu Kadenan.

Su Kapegkagalaw ni Bulus

²Bukati nu su atay nu sa lekami. Dala man pinggula nami a mawag kanu apia entain enggu dala bun nakapasibay nami enggu nadsalimbut'ami. ³Na dikena nia ku kapedtalu sa nia i pedsugaten ku sekanu sa kawagib. Ka mana bun su pidtalu ku sa lekanu a tatap kanu sia kanu atay nami kapatay pan sa kauyag. ⁴Na masela man i salig ku sa lekanu enggu sangat a ibpemamasela ku sekanu. Sangat man a papegkabagelen nu i manggiginawa ku sia kanu kapedtala nami kanu manga kamalasaran taman sa 'bpamelapay su kapegkapia na ginawa ku.

⁵Na apia man su kinauma nami sa Masidunia na da bun makatelen su badan nami. Ka papegkapasangan kami sa apia ngin a ukit. Ka sia kanu embala-bala na nan su manga pegkuntela sa lekami enggu sia menem kanu atay nami na penggeda-geda sabap sa lekanu. ⁶Ugaid'a su Kadenan a papegkabagel kanu taw a pegkalubay i ginawa nin i napagkagalaw sa lekami sia kanu kinauma ni Titus. ⁷Na dikena bu su kinauma ni Titus i nakapagkagalaw sa lekami ka apeg'u napanudtul'in sa lekami a kinapagkagalaw nu sa lekanin. Napanudtul'in bun i 'gkapanadeng'u a benal i kailay nu sa laki enggu 'gkalidu i ginawa nu pantag sa laki taman sa ibpaninideg aku nu. Na sabap sa entu na makin nangiseg su kinagalaw ku.

⁸Na apia man nakalidu sa ginawa nu su sulat ku sa lekanu na dala ku a benal i entu kadsenditi. Nia ku bu nadsenditan na nailay ku a nakalidu sa ginawa nu su entu ugaid'a apia ka maitu na nangagan bu su entu a lidu na ginawa nu. ⁹Na saguna na 'gkagalaw aku dikena sabap kanu kinalidu na ginawa nu ka sabap sa nabaluy i entu a lalan sa kinadtaubat'u. Na kahanda man nu Kadenan su entu enggu da kanu bun kagkaidi nu kinalidu na ginawa nu a entu sa lekami. ¹⁰Kagina su lidu na ginawa a sia luyud kanu kahanda nu Kadenan na nia nin unga na kadtaubat a lalan sa kalipuasan. Tembu di dait a kadsenditan su entu. Ugaid'a su lidu na ginawa a kaduduniay na nia nin unga na

2 Kurintu 7, 8

kapatay.^u ¹¹Na ilay nu u ngin i unga nin sa lekanu su lidu na ginawa a luyud kanu kahanda nu Kadenan. Ka nia nu den kalilinian na su kanggula sa mapia, adil kanu den a benal sa kapaamad'u sa ginawa nu sa dikena kanu 'gkawagiban kanu ipedsendit sa lekanu. 'Gkalipungetan nu su taw a panggula sa kabaladusan, senep sa atay su kapegkagilek'u enggu 'gkapanadeng'u su kailay nu sa laki taman sa pegkiugan nu den a benal ipapenggedam su limu nu sa laki. Pinaginapas'u su kasugat sa kawagib kanu taw a mimbaladusa. Inipaamad'u i dikena kanu 'gkawagiban kanu entu a kabaladusan. ¹²Na apia ka maitu na dikena nia ku kinadsulat sa lekanu i pendawayn ku su taw a panggula sa mawag enggu ibpaninindeg ku menem su taw a pinggulan sa mawag ka nia ku kinadsulat sa lekanu na asal'a 'gkailay nu u endaw taman i kapegkalimu nu sa lekami sia kanu adapan nu Kadenan. ¹³Na sangat man a nakagkabagel kanu manggiginawa nami su langun nu entu.

Na liu kanu kinagkabagel'a manggiginawa nami na labi pan a nakagalaw sa lekami su kinailay nami kanu kagalaw ni Titus sabap kanu kinapalilintad'u kanu itungan nin. ¹⁴Na u ngin i inimamasela ku sa lekanin pantag sa lekanu na da aku nu makapagkaya ka naamad'in i entu sa lekanu sa kanu kinasan nin. Na naamad i benal su inimamasela nami a entu kani Titus sa nia nin kapagidsan sa kabenal na su kabenal'u langun nu kadtalu nami sa lekanu. ¹⁵Na makin nangiseg saguna su kapegkalimu nin sa lekanu uman nin 'gkagkalendem su kabpaginugut'u enggu su kinatalima nu sa lekanin a unut su senep sa atay a kabpagadat. ¹⁶Na 'gkagalaw aku ka masela man i salig ku sa lekanu.

Su Kapangalimuan

8 ¹Manga lusud ku sa tian a 'bpamaginugut, nia nami kalilinian na kasabutan nu u ngin i panggula nu manga lumpukan nu 'bpamaginugut sa Masidunia sabap kanu da idsan nin a limu nu Kadenan a inenggay nin kanilan. ²Ka kanu timpu a kinatala nilan sa mapasang a kamalasyan na apia maitu i 'gkatamanan nilan na 'bpamelapay bun kanu atay nilan su kagalaw tembu apia miskin silan na 'bpamelapay bun kanu atay nilan su kabpangalimuan. ³⁻⁴Na makapangimbenal ku i midtetebe silan menggay sa lawan pan kanu ngin i dait a

^u 7:10 kapatay Nia maena nu kapatay sia na kanarakan.

2 Kurintu 8

ibpagenggay nilan kanu 'bpamaginugut a pakanasisita taman sa silan pan i napakalimu-limu sa lekami sa kaamung'ilan edtabang. ⁵Na su pinggula nilan na minuna pan kanu ngin i 'bpagantapen nami a enggulan nilan ka saben-sabenal a initalapenay nilan i ginawa nilan kanu Mapulu enggu sia sa lekami sia luyud kanu kahanda nu Kadenan. ⁶Tembu ba pinamitalan nami si Titus sa dait a italus'in su galebek a nia a kapangalimuan san sa lekanu kagina ka sekanin bun mambu i tinemutulu sa lekanu sa kanggula nu sa maitu. ⁷Na mana bun su da nu kadtalipenda kanu katulangedan nu kanu langun-langun magidsan pan i sia kanu kapedsalig'u, kangadtalu nu, kapedtuntay nu enggu kapegkalilini nu penggula sa mapia apeg'u kapegkalimu a inipailay nami sa lekanu na maitu bun ba i di nu kadtalipenda kanu kapangalimuan nu.

⁸Na dikena ku i nia ipedsugu sa lekanu ka nia ku kapedtalu sa nia na asal'a maamad ku sa lekanu u endaw taman su kapegkalimu nu sa ukit a kalabit ku sa lekanu kanu katulangedan nu ped sa kalilini nilan sa kadtambang. ⁹Ka katawan nu bun man u endaw taman su dala idsan nin a kapegkalimu nu Mapulu tanu a su Isa al-Masih sa apia man kawasa sekanin na nabaluy sekanin a miskinan sa lekanu a kapianan ka enggu sia makanggulalan kanu kamiskin nin na mabaluy kanu a kawasa.

¹⁰Na sia bu sa laki na mapia a benal sa lekanu amaika italus'u su naludsuan nu a nan a galebekan sa kanu naipus a lagun sa dikena bu matag penggalebeken nu ka 'gkalilinian nu pan gaid penggula. ¹¹Na patalus'u su entu taman sa imasad'u ka enggu nu matalutup su entu sia luyud kanu kapegkiug'u lun a benal penggula a luyud kanu ngin i 'gkagaga nu. ¹²Kagina amaika aden sa lekanu su kalilini enggula sa entu na apia ngin i ipangalimuan nu a sia luyud kanu ngin i 'gkagaga nu na taliman nu Kadenan su entu, ka di kanu nin man pebpagenggayn sa di nu magaga.

¹³Na dikena nia nami menem kahanda i makasesengaw su ped na sekanu menem na 'gkapasangan ka nia nami kahanda na su kadtitimbang'u 'gkatamanan nu uman i isa. ¹⁴Ka su kapegkasengaw nu saguna na pakadtambang kanu kanu pakanasisita. Na amaika sekanu menem i makanasisita enggu silan menem i makasesengaw na silan menem i edtabang sa lekanu. Na amaika maitu na makadtitimbang su 'gkatamanan nu uman i isa. ¹⁵Ka nia man nakadalem kanu kitab na

“Su kinemua sa madakel na dala edsusubela su nakua nin enggu su kinemua sa paidu na dala bun 'gkulang.”^v

Su Kapedtabang'i Titus enggu su manga Tagapeda nin

¹⁶Na pedsukul-sukul aku sa Kadenan ka inipanguatay nin kani Titus su kalilini sa kadtabang sa lekanu sa mana bun su kapegkalilini nami pedtabang sa lekanu. ¹⁷Ka dikena nin bu tinalima su pinangeni nami a kasan nin sa lekanu ka 'gkalilini a benal sa kapedsan nin sa lekanu sabap sa kapegkalilini nin pedtabang sa lekanu. ¹⁸Na paunuten nami bun sa lekanin su lusud tanu sa tian sa paginugut a kilala a benal kanu manga lumpukan nu 'bpamaginugut sabap kanu kapebpayag'in kanu Mapia a Tutuma. ¹⁹Na liu pan sa entu na sekanin bun i pinamili nu manga lumpukan nu 'bpamaginugut a makadtatanggunut sa lekami sa kanu kapendadalakaw nami sa kapegkua enggu kabpagumun kanu inipangalimuan nu 'bpamaginugut ka enggu mapugi su Mapulu enggu makapailay tanu su kapegkiug tanu pedtabang. ²⁰Na pinggula nami su entu ka enggu dala madtalu pantag sa lekami kanu kapedtuganul'ami kanu ibpangalimuan nu 'bpamaginugut. ²¹Ka nia nami man kalilinian penggula na u ngin i wagib kanu adapan nu Mapulu enggu kanu adapan nu manga taw. ²²Na paunuten nami bun kanilan su sakataw pan a lusud tanu bun sa tian sa paginugut a batalu den sekanin sa kapananabangan, labi den i kapegkiug'in pedtabang saguna sabap sa masela a benal i salig'in sa lekanu. ²³Na makapantag menem kani Titus, na isa sekanin a gumagalebek kanu Kadenan a kaped ku kanu galebekan san sa lekanu enggu su manga ped'in menem a lusud tanu bun sa tian sa paginugut na silan i sinugu nu manga lumpukan nu 'bpamaginugut enggu su ukita kapaguyag-uyag'ilan na pakapugi kanu Isa al-Masih. ²⁴Kagina ka maitu na ipailay nu su kakalimu nu kanilan ka enggu nilan 'gkaamad i benal su ibpemamasela nami pantag sa lekanu taman sa mapayag i entu kanu manga lumpukan nu 'bpamaginugut.

Su Tabang kanu Pakanasisita a 'Bpamaginugut

9 ¹Na di den nasisita a sulatan ku pan sekanu pantag kanu kapedtabang kanu 'bpamaginugut. ²Ka katawan ku man su kapegkiug'u a benal pedtabang. Na namba i ibpemamasela ku pantag

^v 8:15 Mailay i nia sia kanu Kinaliu 16 ayat 18 sia kanu Kitab Taurat.

2 Kurintu 9

sa lekanu kanu manga taw sa Masidunia. Pidtalu ku kanilan i iganat kanu naipus a lagun na adil den a benal sa kadtabang su sekanu a manga taw sa Akaya. Na su kapegkiug'u pedtabang i nakaenggat kanu kadakelan kanilan sa kadtabang. ³Na pedsugun ku san su manga lusud tanu a nia sa tian sa paginugut ka enggu kanu den makapagadil kanu manga ipedtabang'u a mana bun su pidtalu ku kanilan pantag sa lekanu. Na amaika maitu na su kabpemamasela nami pantag sa lekanu na di madtalu i dikena benal. ⁴Ka aden a entu na basi aden munut sa laki a manga taw sa Masidunia, na amaika nia nilan mailay i dikena kanu pamun besen adil na makagkaya kami enggu apia sekanu na makagkaya kanu bun. ⁵Tembu ba napagitung ku i pamitialan ku su manga lusud tanu a nia sa tian sa muna den san silan ka enggu nilan maadil su manga tabang a inibpasad'u. Na kanu maya ba a ukit na maadil su entu sa dikena malegen sa ginawa ka maluweg.

⁶Nia nu 'gkakalendem na su kadtalu a nia a

“Su paidu i inisaud'in
na paidu bun i masabpet'in,
su madakel menem i inisaud'in
na madakel bun i masabpet'in.”

⁷Na uman i isa sa lekitanu na dait a inggay nin su ngin i nabputusan nu ginawa nin a inggay nin sa dala kandua-dua nin enggu maluweg kanu atay nin kagina su taw a menggay sa aden kagalaw nin na pakasuat kanu Kadenan. ⁸Na su Kadenan na magaga nin man mangaden sa lekanu su apia ngin a palihala a lawan pan kanu ngin i nasisita nu ka enggu sia kanu langun na timpu na di kanu 'gkulang taman sa makadtabang kanu pan kanu ped sa kagkapia nilan ⁹a mana bun su nakadalem kanu kitab a

“Inipayapat'in su manga tabang'in kanu manga
pakanasisita kanu embala-bala.

Su kapianan nin na di mapupus taman sa taman.”^w

¹⁰Na su Kadenan a 'bpangaden sa uni kanu 'bpangangawid enggu 'bpangaden sa makan na sekanin bun i mangaden sa lekanu sa uni a makasaud'u enggu mapagkadakel kanu entu ka enggu mangiseg su

^w 9:9 Mailay i nia sia kanu Manga Sengal 112 ayat 9 sia kanu Kitab Zabur. Su nia a Sengal na nia nin pedtumbuken na su apia entain a taw a aden gilek'in kanu Kadenan.

kadakil'u masabpet'u a kapianan. ¹¹Palihalan kanu nu Kadenan kanu langun nu ukit ka enggu madakil i kadtabangan nu. Na amaika maitu na madakil i makadsukul-sukul kanu Kadenan sabap kanu manga tabang'u a sia nakanggulalan sa lekami.

¹²Ka su nia man a galebekan nu na dikena nia nin bu 'gkapangaden su nasisita nu 'bpamaginugut ka pakapangaden bun sa sangat a kapedsukul-sukul'u manga taw kanu Kadenan. ¹³Na sia kanu galebekan nu a nia na pakapaamad'u su katulangedan nu. Na madakil i pakapugi kanu Kadenan sia kanu kapenggulalan nu kanu paginugut'u kanu Mapia a Tutuma pantag kanu Isa al-Masih enggu su kabpangalimuan nu kanilan sa maluwas sa atay taman den kanu ped pan a taw. ¹⁴Na su kabpangeni-ngeni nilan sa lekanu na pakapailay kanu senep sa atay a limu nilan sa lekanu sabap kanu dala idsan nin a limu nu Kadenan a nailay nilan sa lekanu. ¹⁵Na sukul-sukul kanu Kadenan kanu dala pagidsan nin a inenggay nin.

Su Kabpanindeg'i Bulus kanu Galebekan nin

10 ¹Na nia pedtalun nu ped na matalaw aku amaika pakapagadapa ku sekanu ugaid'a mawalaw aku amaika di ku sekanu pakapagadapa. Na sia luyud kanu kababa na ginawa nu Isa al-Masih enggu kananaw nin na saki si Bulus ²a 'bpangeni sa lekanu sa sia kanu kapamagadapa tanu na di den nasisita a makapailay ku pan sa lekanu su kawalaw a dait a enggulan ku kanu manga taw a nia nilan 'gkapagitung sa lekami na 'bpaguyag-uyag sia luyud kanu kamamanusiay. ³Na benal man a 'bpaguyag-uyag kami a manusia ugaid'a dikena kami pembunua sa ukit a kamamanusiay. ⁴Ka nia nami man matalem sa kapembunua na dikena pagidsan na 'bpagusalen nu taw sa kapembunua ka nia nami 'bpagusalen na su kabarakat'u Kadenan a pembunua kanu manga bagel'u kuntela. Pembinasan nami su di pakasugat a manga itungan ⁵enggu su ipemamasela a kapagitung a sungkang kanu tidtu a kapegkakilala nu taw kanu Kadenan. Na pegkuan nami su entu a kapagitung'ilan ka ipedtapanay nami kanu Isa al-Masih asal'a sia maluyud sa lekanin su entu a kapagitung'ilan. ⁶Na adil kami sa kapatidtu kanu apia entain a pedsungkang u saben-sabenal a matalutup den su paginugut'u.

⁷Na nia nu bu man 'gkailay na su matakapala a 'gkailay nu mata nu. Na amaika 'bpaginugut kanu sa lusud kanu kanu Isa al-Masih na

pagitung'u bun i lusud kami bun kanu Isa al-Masih. ⁸Na di ku a benal ikaya amaika pedsusubela aku kanu kabpemamasela ku pantag kanu kapegkagaga a inenggay sa lekami nu Mapulu. Kagina su entu na inenggay sa lekami a mausal sa kagkabagel'u dikena sa kabinasa nu. ⁹Na di ku kalilinian i nia matagu sa ginawa nu na 'bpanginggileken ku sekanu kanu manga sulat ku. ¹⁰Kagina nia kadtalu nu ped na "Su manga sulat'in na maugat enggu mabagel ugaid'a amaika pakapagadapa sekanin na malubay enggu su kadtalu nin na dala katagan nin." ¹¹Na patuntayan ku kanu nan a manga taw u ngin i kangadtalu nami sia kanu manga sulat'ami na ipenggulalan nami su entu amaika makapagadapa nami den sekanu.

¹²Na di nami man ilepeng i ginawa nami atawa ka isulagid kanu nan a manga taw a ibpemamasela nilan i ginawa nilan. Na 'gkailay a benal i kada na akal'ilan sa kapedtengkad'ilan sa ginawa nilan enggu kapapedsulagid'ilan kanu ginawa nilan sa silan demun. ¹³Ugaid'a sekami na dikena nami ibpemamasela su liu kanu ngin i inisangan sa lekami a galebek ka nia nami bu ibpemamasela na su ngin bu i inisangan sa lekami nu Kadenan a nakasampay taman sa lekanu. ¹⁴Tembu ba su kabpamandu nami sa lekanu na dikena i entu nakaliu kanu ngin i inisangan sa lekami ka sekami man i nauna a nakauma san sa lekanu a namandu kanu Mapia a Tutuma pantag kanu Isa al-Masih. ¹⁵Na dikena nami man ibpagamung 'bpemamasela su galebekan nu ped a taw. Ugaid'a nia nami 'gkapaginagkay na miseg su salig'u kanu Kadenan asal'a makaiseg bun su galebekan nami san sa lekanu ¹⁶ka enggu nami makapangusiat su Mapia a Tutuma kanu manga dalepa a mawatan sa lekanu ka enggu di madtalu sa lekami i ibpemamasela nami su galebekan a ped a taw i minggalebek lun. ¹⁷Na apia entain i pegkiug 'bpemamasela na nia nin imamasela na su Mapulu.^x ¹⁸Kagina dikena man su taw a ibpemamasela nin i ginawa nin i matalima ka su taw a ibpemamasela nu Mapulu.

Si Bulus enggu su manga 'Bpamagigiling a Sinugu

11 ¹Na nia ku 'gkapangingalap sa lekanu na kadsabalan aku nu kanu paidu a nia a mana kababalan a kadtalu ku. 'Bpangenin

^x 10:17 Na apia entain i pegkiug 'bpemamasela na nia nin imamasela na su Mapulu. Mailay i nia sia kanu Kitab a Inisulat'u Nabi Yaramias 9 ayat 24.

2 Kurintu 11

ku sa lekanu i edsabali aku nu sa entu. ²Ka pakapangalikud aku man sa lekanu a mana su kabpangalikud'u Kadenan. Ka mana kanu bun man laga a inibpasad ku sa kadtampung'in kanu isa a mama. Na su entu a mama na su Isa al-Masih. Na nia ku kalilinian na makapalad ku sekanu sa lekanin sa dala tila nu. ³Ugaid'a 'gkagilekan aku sa telenan nu su senep sa atay a kapaginugut'u kanu Isa al-Masih sabap sa makasibay su palitiala nu a mana su Siti Hawa^y a napagakalan nu nipay. ⁴Kagina malemu kanu a benal pakapalitiala amaika aden pakauma sa lekanu a 'bpangusiat sa salakaw pantag kanu Isa al-Masih a dikena su ibpangusiat'ami. Pedtaliman nu bun su ped a ruh a salakaw kanu natalima nu enggu pedtaliman nu bun su ibpangusiat sa lekanu a mapia a tutuma a salakaw kanu natalima nu a tidtu a Mapia a Tutuma.

⁵Na nia ku lun kapegkailay na pakalepeng aku bun kanu manga taw a nadталu a mangategel a sinugu. ⁶Ka apia dikena aku gaid mategel sa kadtalu-talu ugaid'a aden sa laki su katuntay kanu bantang. Na nakapaamad'ami i entu sa lekanu sa mapia sa kanu apia ngin a ukit.

⁷Na ngintu, kabaladusan i kababa ku kanu ginawa ku asal'a makapulu kanu sabap sa inipangusiat ku sa lekanu su Mapia a Tutuma a ebpun kanu Kadenan sa dala bayad'in? ⁸Na dikena man mawag i kinatalima ku kanu tabang a ebpun kanu ped a lumpukan nu 'bpamaginugut asal'a kanggalebekan ku sekanu. ⁹Ka kanu san aku pan sa lekanu na amaika aden nasisita ku na da ku ibpaliugat sa lekanu ka nia man nangaden kanu manga nasisita ku na su manga lusud sa tian sa paginugut a nakabpun sa Masidunia. Na inabungan ku a benal i makaugat aku sa lekanu sa apia ngin a ukit taman sa papanalusen ku su entu. ¹⁰Na su ibpemamasela ku a nia na dala makagaga lun melen kanu prubinsia a Akaya. Na su kabantang'u entu na mana bun su kabantang'u Isa al-Masih a sia sa laki. ¹¹Na dikena nia maena nu entu i dikena ku sekanu ipegkalimu. Ka su Kadenan man i labi a pakataw u endaw taman i kapegkalimu ku sa lekanu!

¹²Na papanalusen ku su maitu a ukit ku ka enggu 'gkapelen su 'bpamedsungkang sa lekami sa su kabpemamasela nilan sa su galebekan nilan na isa bu kanu penggalebeken nami. ¹³Kagina su

^y 11:3 Mailay su makapantag kanu Siti Hawa sia kanu Manga Awal 2 taman sa 3 sia kanu Kitab Taurat.

entu man a manga taw na dikena tidtu a sinugu, manga salimbuten silan a gumagalebek enggu 'bpamagigiling silan sa sinugu silan nu Isa al-Masih. ¹⁴Na dikena man i entu pakagaip kagina maitu bun ba su Datu na Giadsal a 'bpamagigiling sa malaikat'u kaliwanagan. ¹⁵Tembu dikena pakagaip i su manga ulayat'in na 'bpamagigiling sa ikelas a gumagalebek. Na masabpet'ilan man su ngin i unga nu galebek'ilan.

Su Kamalayanan a Natala ni Bulus kanu Kinabaluy nin a Sinugu

¹⁶Na 'bpalumanan ku edtalun sa lekanu i di nu 'bpagitunga i babal aku. Ugaid'a amaika menem ka entu ba i 'gkapagitung'u sa laki na padtaday aku nu den sa entu ka enggu apia paidu bu na makamamasela aku.

¹⁷Na u ngin i pedtalun ku kanu nia a kabpemamasela ku na dikena i entu ebpun kanu Mapulu ka ebpun kanu kababalan nu kamamanusiay ku. ¹⁸Na kagina ka madakel bun a kabpemamasela a luyud kanu kamamanusiay na mamung aku bun mambu sa kabpemamasela. ¹⁹Ka matag'u man ipedtimbang i ginawa nu sa balaitungan kanu ugaid'a kalinian nu gaid 'bpagunut su manga babal a manga taw! ²⁰Ka di nu demun pedsungkangen su apia entain a 'bpangungulipen bu sa lekanu, pembusaw kanu apia ngin a kaaden nu, 'bpamakut sa lekanu, pebpapulu sa lekanu enggu pedtebpi kanu beneng'u. ²¹Na amaika makaya i malubay kami sa kanggula sa manga maitu ba na pedtaliman ku.

Ugaid'a u ngin i ipembabadtug'u apia entain, na makambabadtug ku bun su entu (apia nia nin kaaden i pakailing aku sa babal sa kapedtalun ku sa nia). ²²Ka amaika manga taw silan a Hibru na taw aku bun a Hibru. Na u manga taw silan a Israil na taw aku bun a Israil. Na u manga tupu silan nu Ibrahim na tupu aku bun nu Ibrahim. ²³Na u panunugun silan nu Masih na labi aku den a panunugun nu Masih. (Na pakailing aku sa babal saguna sa kapedtalun-talu sa nia.) Na labi aku man a midtantu enggalebek kumin kanilan, madakel i kinabilanggu ku enggu di den mabilang i kinapametay sa laki taman sa tatap man 'gkapaidusaman su umul ku. ²⁴Na nakalima aku nabpalumanan mapalebpad'u manga pagidsan ku bun a Yahudi sa enggaga-telupulu enggu siyaw kalebpad su uman i kinalebpad'ilan sa laki. ²⁵Nakatelu aku napametay sa tungked enggu nakaisa menem i kinapamalantay sa laki sa watu. Nakatelun aku bun nakatala sa migkalat i kapal a pinagedan ku. Na nalalamagan enggu nagagabian na panggampung-gampung aku bu

kanu lagat. ²⁶Na sia kanu kapendadalaug ku na tatap 'gkapaidusaman i umul ku magidsan i sia sa manga pulangi, kanu manga tanegkawn a manga taw enggu kanu manga taw a sakalugu ku bun taman den kanu manga dikena-Yahudi. Maitu bun tatap bun 'gkapaidusaman su umul ku kanu manga siudad, kanu tawan-tawan a manga dalepa enggu kanu manga lagat taman den kanu manga taw a 'bpamagigiling sa lusud sa tian sa paginugut.

²⁷Na tinemala aku sa mapasang a kinanggalebek enggu nalugat aku a benal. Tatap dala tulug ku sa magabi, 'bpelunusan aku enggu dala 'gkainum ku. Tatap dala pegken ku enggu 'bpanenggawn aku ka dala gaid 'gkambalegkas ku. ²⁸Na liu pan sa entu, na uman gay na 'gkambawa-bawa ku pan su lidu na ginawa kanu langun nu lumpukan nu 'bpamaginugut. ²⁹Ka entain ba man kanilan i penggedam sa kalubayan a di ku 'gkagedam su kalubayan nilan? Entain ba i pakapambaladusa kanilan a dikena i entu pakasakit kanu ginawa ku?

³⁰Na amaika emamasela aku man na nia ku imamasela na su langun na kalubayan ku. ³¹Na su Kadenan a Ama nu Mapulu tanu a su Isa al-Masih a Kadenan nin bun i pakataw sa dikena aku pembudtud. Sekanin i pebpugin taman sa taman! ³²Na kanu lu aku pan sa dalepa a Damaskus a nia lun pendatu na si Datu Aritas, na pinatamengan nin su bengawan nu siudad kanu gubilnadul lu ka enggu aku masigkem. ³³Ugaid'a pinapageda aku kanu bukag ka initudtun aku kanu liu nu alad a lu aku pinaukit kanu paliungan asal'a makalipuas aku kanu entu a gubilnadul.

Su manga Naalung'i Bulus enggu su Inipayag lun nu Mapulu

12 ¹Na nasisita man i embabadtug aku apia 'gkatawan ku bun i dala makagkapia nin su entu. Na ipayag ku sa lekanu saguna su inipaalung enggu su manga inipayag'u Mapulu. ²⁻³Na nakasapulu enggu pat lagun den i naipus na aden katawan ku a taw a 'bpaginugut kanu Isa al-Masih a init lu kanu ikatelu a pangkat'u sulega. Na di ku katawan u matakapala a su badan nin i init lu atawa ka su ngiawa nin bu. Na su Kadenan bu i labi a pakataw sa entu. Na su entu a taw ⁴na init lu sa sulega. Daka nakakineg sekanin lu sa makagaip-gaip a dala makagaga lun edsinantal enggu dala isugut kanu apia entain i kapanudtul kanu entu. ⁵Na makamamasela ku su pantag kanu nanggula nu entu a taw

ugaid'a pantag kanu ginawa ku na dala makamamasela ku nia tabia na su manga kalubayan ku. ⁶Ugaid'a amaika menem ka pegkiug aku sa 'bpamamasela, na dikena kababalan su entu ka benal. Ugaid'a di ku den enggulan i entu ka enggu di 'gkapulu i kailay nu taw sa laki sa kanu ngin i matakapala a 'gkailay atawa ka 'gkagineg'ilan sa laki. ⁷Na sabap kanu inipayag'u Kadenan a entu a manga kagaipan na inisugut'u Kadenan i lasayn aku nu Datu na Giadsal sa sakit a mana sudang kanu badan ku ka enggu di ku makamamasela su ginawa ku. ⁸Na nakatelu aku nakapangadap mangeni kanu Mapulu sa kaawa nu entu a sakit sa laki. ⁹Ugaid'a nia nin inisawal sa laki na "Su kapegkalimu ku na da kulang'in san sa leka ka su kapegkagaga ku na labi man a 'gkapayag sa mapia sia kanu kalubayan nu taw." Tembu sangat a magalaw aku kanu kapembabadtug ku kanu manga kalubayan ku kagina sabap sa entu na lalayun sia sa laki su kapegkagaga nu Isa al-Masih. ¹⁰Na namba i sabap'in ka 'gkagalaw aku sia kanu manga kalubayan ku, sia kanu kapapegkaya sa laki, sia kanu kapapegkapasang sa laki enggu kanu kabpamungkaid sa laki taman den kanu manga kamalayanan a 'gkatala ku sabap kanu paginugut ku kanu Isa al-Masih. Kagina sia kanu kalubayan ku na papegkabagelen aku.

Su Kapegkalimu ni Bulus kanu manga Taw sa Kurintu

¹¹Na nakailing aku man sa babal ugaid'a sekanu bun i sinemundul sa laki sa kamamasela ku a entu. Nia pan dait na inimamasela aku nu ka nakalepeng aku bun kanu manga taw a nadtalu a mangategel a sinugu apia nia nin kaaden i dala makamamasela ku kanu ginawa ku. ¹²Na su manga tanda a saben-sabenal a sinugu su isa a taw na nailay nu bun i entu sia kanu manga tanda a kangagaipan taman den kanu manga ped pan a kabarakatan a pinggula ku san sa lekanu sa aden kasabal'in. ¹³Na su langun na pinggula ku kanu ped a lumpukan nu 'bpamaginugut na pinggula ku bun san sa lekanu, nia bu tabia na su da ku bu kabpaliugat mangeni sa lekanu sa tabang. Na amaika mawag su entu na ampun aku nu.

¹⁴Na saguna na adil aku den sa kasan ku menem sa lekanu sa ikatelu den i nia a kambalingan ku san. Na maitu bun ba, di ku bun sekanu lingasan sa kadtabang'u sa laki kagina dikena nia ku nasisita su manga kaaden nu ka nia ku nasisita na sekanu. Ka dikena man su manga

2 Kurintu 12, 13

wata i dait a lemimud sa kaaden sa kanu manga lukes'in ka su manga lukes i dait a enggula sa entu kanu manga wata nin.

¹⁵Ka nia paman labi a makagalaw sa laki na su kaenggay ku sa lekanu sa kanu ngin i kaaden ku apeg den nu ginawa ku. Na amaika maitu sa sangat a ipegkalimu ku sekanu na dait ba a sapindit bu i kakalimu nu sa laki? ¹⁶Na 'gkatawan nu bun man a benal i dikena aku pakalingasa sa lekanu. Ugaid'a su ped sa lekanu na nia nilan pedtalun na tagakalen aku ka nakua ku kun sekanu sa akal. ¹⁷Na ngintu, pinamakutan ku sekanu sia kanu apia entain a sinugu ku san sa lekanu? Dala. ¹⁸Na si Titus a pinamitalan ku sa kasan nin sa lekanu a pinaunut ku sa lekanin su suled tanu bun sa paginugut, na ngintu, pinamakutan kanu nin? Dala. Ka isa bu man i tangga na ginawa nami enggu ukit'ami.

¹⁹Na aden a entu na nia matagu sa ginawa nu sampay saguna na ibpaninindeg'ami bu su ginawa nami sa lekanu. Ugaid'a dikena maitu manga papedtayan a lusud ku sa tian, ka pedtalun nami su entu sia kanu adapan nu Kadenan sabap sa nalusud kami kanu Isa al-Masih enggu langun man nu penggulan nami na sia kanu kagkabagel'u. ²⁰Na penggeda-geda man i ginawa ku sa kasan ku sa lekanu sa dikena nia ku mailay su 'gkapangingalap ku a mailay ku sa lekanu enggu maitu kanu bun sia sa laki ka dikena nia nu mailay su 'gkapangingalap'u a mailay nu sa laki. Ka tabia bun ka kauman ku sekanu a 'bpamangukag, pebpapangalikuda enggu pendidilipungeta, pedsesenggaya, pegkalatan na uman i isa i ped'in, pendidilibaka, pebpapuluan na uman i isa i ped'in enggu di 'bpamagayun. ²¹Na penggeda-geda aku bun sa kanu kambalingan ku san na basi ibaba nu Kadenan i ginawa ku kanu adapan nu. Na sangat man a malidu i ginawa ku kanu madakel a taw a mimbaladusa a di nilan pedtaubatan su pinggalebek'ilan a mangaledsik, kapedsisina enggu kanguda na ginawa.

Su Ped a Papata ni Bulus kanu manga Taw sa Kurintu

13 ¹Na ikatelu den i nia a kapedsan ku sa lekanu. "Na apia ngin i ipedsendit kanu taw na dait a makapaamad i entu nu dua kataw atawa ka telu kataw a saksi."^z ²Na kanu ikadua a kinasan ku na nakapaingat ku den su manga pembaladusa a nan. Na pebpagingaten

^z 13:1 Mailay i nia sia kanu Diutirunumi 19 ayat 15 sia kanu Kitab Taurat.

2 Kurintu 13

ku menem silan 'bpaluman taman den kanu ped pan a pembaladusa san sa di ku lasamen su apia entain a pembaladusa amaika makambalingan aku den san. ³Na maamad'u lu ba i saben-sabenal a su Isa al-Masih na pedtalua sia pakanggulalan sa laki. Na dikena man malubay su Isa al-Masih sa kapatidtu nin sa lekanu ka mabagel sekanin sa entu. ⁴Apia nia nin kaaden i malubay sekanin kanu kinatutuk lun kanu kayu a pinambalawaga ugaid'a 'bpaguyag-uyag sekanin saguna sia kanu kabarakat'u Kadenan. Na maitu kami bun ba, nabaluy kami a malubay sia kanu kinaisa nami sa lekanin ugaid'a 'bpaguyag-uyag kami bun kaped'in sia kanu kabarakat'u Kadenan sa kanu kapenggalebek'ami san sa lekanu.

⁵Na ilay nu sa mapia i ginawa nu ka enggu nu 'gkatawan u saben-sabenal a 'bpaguyag-uyag kanu sia luyud kanu salig'u. Ipaamad'u sa mapia su salig'u. Nia man dait na 'gkatalanged'u den kanu ginawa nu i su Isa al-Masih na pedtapiden kanu nin, nia tabia na dikena tidtu su kapedsalig'u. ⁶Nia ku 'gkapangingalap na maamad'u bun kanu ginawa nu i tidtu kami a sinugu. ⁷Na ipangeni-ngeni nami kanu Kadenan i di kanu makanggula sa apia ngin a mawag. Dikena nia nin sabap i asal'a mailay i tidtu kami a sinugu ka nia nin sabap na asal'a nia nu manggalebek na su ngin i mapia, apia nia nami pan kalagidan i mana kami dikena tidtu a sinugu. ⁸Ka di kami man enggula sa makasungkang kanu bantang ka nia pan mula na itindeg'ami su entu. ⁹Ka sangat man a magalaw kami amaika sia kanu kapegkalubay nami na mailay nami i pegkabagel kanu. Ka nia nami man ibpangeni-ngeni sa lekanu na mabaluy kanu a dala tila nin. ¹⁰Tembu ba inisulat ku su langun nu nia sa lekanu gagalu nu dala aku pan san ka enggu kanu kauma ku san na di den nasisita a inggulalan ku pan sa peges su kapegkagaga a inenggay nu Mapulu sa laki. Ka inenggay nin man su entu a mausal sa kagkabagel'u dikena sa kabinasa nu.

Su Nauli a Salam enggu Pangeni-ngeni

¹¹Nia den mauli sa entu manga lusud ku sa tian sa paginugut na enggalaw-galaw kanu. Paginapas'u i di kanu den katilan, inggulalan nu su manga papata ku, pamagisa-isa kanu enggu paguyag-uyag kanu sa aden kalilintad'in. Ka amaika maitu na tapiden kanu nu Kadenan a malimu a 'gkabpunan nu kalilintad.

A decorative border with floral motifs at the corners and midpoints of the top and bottom edges, enclosing the text.

2 Kurintu 13

¹²Na salamen na uman i isa su ped'in sia luyud kanu kinasuti lun nu Kadenan. ¹³Pedsalamen kanu bun nu langun nu 'bpamaginugut sia. ¹⁴Na san sa lekanu su limu nu Kadenan a Mapulu enggu su da idsan nin a limu a sia nakanggulalan kanu Mapulu a su Isa al-Masih apeg den nu kapagisa nu Suti a Ruh sa lekanu.

Wassalam